

AKASHVANI AIZAWL
REGIONAL NEWS UNIT
(MIDDAY)

Friday, April 11, 2025

Time - 2:30pm - 2:35pm



CM

Tukin khan Chief Minister Pu Lalduhoma leh UD & PA Minister Pu K. Sapdanga te chuan Aizawl Ven Buk (Integrated Command & Control Centre under Smart City), Treasury Square a mi an tlawh.

Chief Minister chuan, Aizawl hmunhma lun zual lai cover vek thei CCTV network, record fiah leh changkang tak a awm chu lawmawm atih thu sawiin enkawl na lam hautak deuh mah se ram leh khawtlang venhimna kawngah a tangkai dawn tih sawiin chhiatna thlen palh theihna hmunah a tangkai zual dawn tih a sawi.

UD&PA Minister Pu K. Sapdanga chuan Control Room chu an hmang tangkai hle tih sawiin misual, rukru leh dawt sawi ching thlengin an chhui chhuak thin a ti a, thil thleng dik tak a hmuh theih avangin hnuchhui kawngah a tangkai takzet tih a sawi.

Aizawl Smart City CEO Pu CC Lalchhuangkima chuan an hnathawh dan tlangpui sawiin Aizawl khawpui hmun thlan bik 76 ah CCTV 237 leh Pan Tilt Zoom 39 dah a ni a ti a. An dahna hmun zawng zawng mipui hnenah an hrilh vek lo tih sawiin Hmun pawimawh lai chu an hmu thei deuh vek tawh a ti , Hmun thenkhatah chuan hmel hre hranga chhinchhiah thei (Facial Recognition) Camera dah an ni tih sawiin Lirthei pawh an vah velna thlengin an hre thei a, an Automatic Number Plate Recognition system hmangin lirthei bo case 600 vel lai an ching fel tawh tih sawiin Lirthei, traffic dan bawhchhia pawh an chhui zel thei tih a sawi.

Aizawl Ven Buk (ICCC) hi April ni 1, 2023 khan Union Home Minister Amit Shah, chuan a hawng a, cheng vbch 87.18 senga din niin A enkawl nan thlatin sum cheng nuai 7 sing 8 vel mamawh a ni a, Mipui, a hmang tangkai duh tan cheng 100 chawia hman theih a ni.

Chief Minister-in Aizawl Ven Buk a tlawhnaah hian sawrkara mi pawimawh ten an tawiawm a ni.



RS MP

Rajya Sabha MP Pu K. Vanlalvena'n Mizorama raltlan thalaite mahni ram chhanhim nana pen chhuak vek turin a duh thu a sawi a, tanpui an ngaihna an an tan an awm zel dawn tih a sawi.

He thu hi vawiina Mizo Hnam Run chhung inkhawmah sawiin Pu K. Vanlalvena chuan kum 2021-a Myanmar tualchhung buaina avanga rawn tlan thla chu sawrkarin rei tak a chawm hnuah an tih chhunzawm theih reng loh avangin hmun hrang hrangah raltlan an awm darh nasa a ti a, Chin State Mizoram let thum vel laia lian ah mipui nuai 5 vel bak an awm tawhlo tih sawiin sipai sawrkar hneh turin puih an ngai a ti a, thalai tam tak Mizoram ah an awm tih sawiin thalai ten Myanmar sipai sawrkar do let turin an ramah an haw a ngai a ti a, tanpui an ngaihna ah an tan an awm reng dawn tih a sawi.

Rajya Sabha MP chuan Manipura zohnahthlak unaute chungchang sawiin chi leh chi indona sim a pawimawh a ti a, Mizoram hmun hrang hrangah Manipur raltlan thalaite awm ngawt lovin an hmelma do turin an haw a ngaih thu a sawi bawk.

Pu Vena chuan MNF Party chu Mizoram leh hnam tana kal na ngam ber an ni a ti a, Assam nena ramru buai chungchangah pawh huai takin Mizoram tan an kal thin tih sawiin ram leh hnam tana hma la nasa ber an ni tih a sawi.

Rajya Sabha MP chuan tunhnaia Mizoram assembly budget session-a Chief Minister Pu Lalduhoma’n UCC chungchang a sawi chu thu belhchian dawl lo ani a ti a, UCC chu an sawrkar laia do nasa ber an ni tih sawiin UCC bill chu parliament ah put luh ala ni ngai lo a ti a, vote lak ala nilo tih sawiin MNF sawrkar laiin UCC duh lamah vote an pe atih chu dawt ani tih a sawi bawk.



NATIONAL TRIBAL YOUTH FESTIVAL

Ministry of Tribal Affairs leh Directorate of Social Welfare, Women & Child Development Department hmalaknaa buatsaih National Tribal Youth Festival ni 4 awh chu vawiin khan State Tribal Resource Centre, Kelsih-ah kharna hun hman a ni.

National Tribal Youth Festival hi Chief Secretary Pu Khilli Ram Meena chuan April ni 8 khan a hawng a, he festival chhung hian thenawm state atangin zai leh lam thiam tam tak an lokal a, Mizoram State Commission for Protection of Child Rights Chairperson chuan Pu Jimmy Laltlanmawia Mizo hnam ziarang chawisan kawngah mipuiten tan lak thar a pawimawh tih sawiin hnam nunphung leh chetzia hman atanga lo vawn nun tawh te thar thawh a pawimawh tih a sawi.

He festival chhung hian rimawi leh hnam lam chi hrang hrang bakah Food Court, exhibition te nen hun hlimawm tak hman theih tura buatsaih a ni a, he hunah hian Nagaland atangin Imnainla Jamir, Manipur atangin Vawnchawi Vaiphei leh zaithiam hrang hrang an inlan a ni.



DINTHAR PROTEST

Dinthar veng Local Council kaihhruaina in Dinthar pawl hrang hrangin vawiin khan an veng chhungah Heroin hawng 440 manna a inhnamhnawiha puh Pu Henry Lalbiakzinga Chhundeng laka lungawi loh lantir na’n kawng an zawh.

No 4 hawng 440 chungchanga Dinthar Mipui lungawi lohna Kawngzawh hi Dinthar kawn atanga tan a ni a, Mipui pungkhawm chuan Dinthar khawtlangin ruihhlo an do zel tur thu leh Thalaite nunna suattu ruihhlo an do zel dawn tiin an au rual a ni.

Dinthar kawn atangin Heroin hawng 440 mannaa inhnamhnawiha puh, Pu Henry Lalbiakzinga Chhundeng te inkawt thleng kawng an zawh a, an inkawtah hian Resolution chhiar chhuah niin khawtlang mipuite chuan resolution hi an pawmpui tih lantir nan an ban ding lam pharin an au rual a ni.

Lungawi loh kawng zawh chhung hian Dinthar veng chhunga two wheeler taxi leh taxi pangngai bakah eichawp dawr, sa leh chawhmeh zuar zawng zawng te chu khawtlang hruaituten an ngen angin an khar vek a ni.

Hetihlai hian Dinthar veng thalaite chuan vawiina Dinthar khawtlang lungawi loh lantirna chu Heroin hawng 440 chungchang bik ni lova, ruihhlo do kawngzawh ni zawk maha an hriat avangin an thlawp lo a.

Akashvani zawhna chhangin, Dinthar thalai thenkhatte chuan vawiina Dinthar khawtlang lungawi loh lantirna chu khawtlang hruaitute hmalakna chu boruak vuak daih tumna ang an tih thu an sawi bawk a ni.

Nizan dar 10 vel atang khan Dinthar veng thalai thinurte chuan Henry Lalbiakzinga Chhundeng chenna in kawtah pungkawmin, inneitute pot hmangin an lirthei an tichhia a, thalai pungkawmte hi zan dar 12 velah an tin darh a, Tuki dar 3 vel khan Pu Henry-a chenpui mi 7 te chuan an chenna in hi a chhuahtsan a, tun dinhmunah an inah hian tumah an awm rih lo a ni.

